

儒宗理要

朱子卷十一

後學西山張能鱗纂輯

經史類

文集

大學章句序

大學之書古之大學所以教人之法也蓋自天降生民則既莫不與之以仁義禮智之性矣然其氣質之稟或不能齊是以不能皆有以知其性之所有而全之也有一聰明睿智能盡其性者出於其間則天必命之以爲億兆之君師使之治而教之以復其性此伏羲神農黃帝堯舜所以繼天立極而司徒之職典

樂之官所由設也。三代之隆，其法浸備。然後王宮國都以及閭巷，莫不有學。人生八歲，則自王公以下，至於庶人之子弟，皆入小學而教之。以洒掃應對進退之節，禮樂射御書數之文。及其十有五年，則自天子之元子衆子，以至公卿大夫元士之適子，與凡民之俊秀，皆入大學而教之。以窮理正心修己治人之道。此又學校之教，大小之節，所以分也。夫以學校之設，其廣如此，教之之術，其次第節目之詳，又如此。而其所以爲教，則又皆本之人君躬行心得之餘，不待求之民生日用彝倫之外。是以當世之人，無不學。其學焉者，無不有以知其性分之所固有，職分之所當爲，而各俛焉以盡其力。此古昔盛時，所以治隆於上，俗

美於下而非後世之所能及也。乃周之衰，賢聖之君不作，學校之政不脩，教化陵夷，風俗頹敗，時則有若孔子之聖而不得君師之位以行其政教，於是獨取先王之法，誦而傳之以詔後世。若曲禮少儀內則弟子職諸篇，固小學之支流餘裔，而此篇者，則因小學之成功以著大學之明法。外有以極其規模之大，而內有以盡其節目之詳者也。三千之徒，蓋莫不聞其說，而曾氏之傳獨得其宗，於是作爲傳義以發其意。及孟子沒，而其傳泯焉，則其書雖存而知者鮮矣。自是以來，俗儒記誦詞章之習，其功倍於小學而無用，異端虛無寂滅之教，其高過於大學而無實。其他權謀術數，一切以就功名之說，與夫百家衆技之流，所

以惑世誣民充塞仁義者又紛然雜出乎其間使其君子不幸而不得聞大道之要其小人不幸而不得蒙至治之澤晦盲否塞反覆沈痼以及五季之衰而壞亂極矣天運循環無往不復宋德隆盛治教休明於是河南程氏兩夫子出而有以接乎孟氏之傳實始尊信此篇而表章之既又爲之次其簡編發其歸趣然後古者大學教人之法聖經賢傳之指粲然復明於世雖以熹之不敏亦幸私淑而與有聞焉顧其爲書猶頗放失是以忘其固陋采而輯之間亦竊附已意補其闕略以俟後之君子極知僭踰無所逃罪然於國家化民成俗之意學者脩己治人之方則未必無小補云

中庸集解序

中庸之書子思子之所作也。昔者曾子學於孔子而得其傳矣。孔子之孫子思又學於曾子而得其所傳於孔子者焉。既而懼夫傳之久遠而或失其真也。於是推本所傳之意質以所聞之言更相反覆作爲此書。孟子之徒實受其說。孟子沒而不得其傳焉。漢之諸儒雖或擎誦然既雜乎傳記之間而莫之貴又莫有能明其所傳之意者。至唐李翱始知尊信其書爲之論說然其所謂滅情以復性者又雜乎佛老而言之則亦異於曾子子思孟子之所傳矣。至於本朝濂溪周夫子始得其所傳之要以著於篇。河南二程夫子又得其遺旨而發揮之然後其學布於

天下然明道不及爲書。今世所傳陳忠肅公之所序者。乃藍田呂氏所著之別本也。伊川雖嘗自言中庸今已成書。然亦不傳於學者。或以問於和靖尹公。則曰。先生自以不滿其意而焚之矣。二夫子於此。旣皆無書。故今所傳。特出於門人記平居問答之辭。而門人之說行於世者。唯呂氏游氏楊氏侯氏爲有成書。若橫渠先生。若謝氏尹氏。則亦或記其語之及此者耳。又皆別自爲編。或頗雜出他記。蓋學者欲觀其聚而不可得。固不能有以考其異而會其同也。某之友會稽石君塾子重。乃始集而次之。合爲一書。以便觀覽。名曰中庸集解。復第其錄如右。而屬某序之。熹惟聖門傳授之微旨。見於此篇者。諸先生言之詳矣。某

之淺陋。蓋有行思坐誦。沒世窮年。而不得其所以言者。尚何敢措一辭於其間。然嘗竊謂秦漢以來。聖學不傳。儒者惟知章句訓詁之爲事。而不知復求聖人之意。以明夫性命道德之歸。至于近世。先知先覺之士。始發明之。則學者既有以知夫前日之爲陋矣。然或乃徒誦其言。以爲高。而又初不知深求其意。甚者遂至於脫略章句。陵藉訓詁。坐談空妙。展轉相迷。而其爲患。反有甚於前日之爲陋者。嗚呼。是豈古昔聖賢相傳之本意。與夫近世先生君子之所以望於後人者哉。某誠不敏。私竊懼焉。故因子重之書。特以此言題其篇首。以告夫同志之讀此書者。使之毋歧於高。毋駭於奇。必沈潛乎句讀文義之間。以會其歸。必

戒懼乎不睹不聞之中以踐其實庶乎優柔厭飫真積力久而於博厚高明悠久之域忽不自知其至焉則爲有以真得其傳而無徒誦坐談之弊矣抑子重之爲此書米掇無遺條理不紊分章雖因衆說然去取之間不失其當其謹密詳審蓋有得乎行遠自邇升高自卑之意唯哀公問政以下六章據家語本一時問答之言今從諸家不能復合然不害於其脉理之貫通也又以簡帙重大分爲兩卷亦無他義例云

語孟集義序

初曰精義後改今名

論孟之書學者所以求道之至要古今爲之說者蓋已百有餘家然自秦漢以來儒者類皆不足以與聞斯道之傳其溺於卑

近者既得其言而不得其意其驚於高遠者則又支離踳駁或
乃并其言而失之學者益以病焉宋興百年河洛之間有二程
先生者出然後斯道之傳有繼其於孔子孟氏之心蓋異世而
同符也故其所以發明二書之說言雖近而索之無窮指雖遠
而操之有要使夫讀者非徒可以得其言而又可以得其意而
又可以并其所以進於此者而得之其所以興起斯文開悟後
學可謂至矣間嘗蒐輯條流以附本章之次旣又取夫學之有
同於先生者若橫渠張公范氏二呂氏謝氏游氏楊氏侯氏尹
氏凡九家之說以附益之名曰論孟精義以備觀省而同志之
士有欲從事於此者亦不隱焉抑嘗論之論語之言無所不包

而其所以示人者莫非操存涵養之要七篇之指無所不究而其所以示人者類多體驗充擴之端夫聖賢之分其不同固如此然而體用一源也顯微無間也是則非夫先生之學之至其孰能知之嗚呼茲其所以奮乎百世絕學之後而獨得夫千載不傳之傳也歟若張公之於先生論其所至竊意其猶伯夷伊尹之於孔子而一時及門之士考其言行則又未知其孰可以爲孔氏之顏曾也今錄其言非敢以爲無少異於先生而悉合乎聖賢之意亦曰大者既同則其淺深疏密毫釐之間正學者所宜盡心耳至於近歲以來學於先生之門人者又或出其書焉則意其源遠末分醇醪異味而不敢載矣或曰然則凡說之

行於世而不列於此者皆無取已乎。曰不然也。漢魏諸儒正音讀通訓詁考制度辨名物其功博矣。學者苟不先涉其流則亦何以用力於此。而近世二三名家與夫所謂學於先生之門人者其考證推說亦或時有補於文義之間。學者有得於此而後觀焉則亦何適而無得哉。特所以求夫聖賢之意者則在此而不在彼爾。若夫外自託於程氏而竊其近似之言以文異端之說者則誠不可以入於學者之心。然以其荒幻浮夸足以欺世也。而流俗頗已鄉之矣。其爲害豈淺淺哉。顧其言語氣象之間則實有不難辨者。學者誠用力於此書而有得焉則於其言雖欲讀之亦且有所不暇矣。然則是書之作其率爾之誦雖不敢

辭至於明聖傳之統成衆說之長折俗流之謬則竊亦妄意其庶幾焉。

皇極辨 論皇極訓大中之非

洛書九數而五居中。洪範九疇而皇極居五。故自孔氏傳訓皇極爲大中。而諸儒皆祖其說。余獨嘗以經之文義語脉求之。而有以知其必不然也。蓋皇者君之稱也。極者至極之義。標準之名。嘗在物之中央。而四外望之以取正焉者也。故以極爲在中之準的。則可。而便訓極爲中。則不可。若北辰之爲天極。脊棟之爲屋極。之義皆然。而禮所謂民極。詩所謂四方之極者。於皇極之義爲尤近。顧今之說者。旣誤於此。而并失於彼。是以其說展

轉迷謬而終不能以自明也。卽如舊說姑亦無問其他。但卽經文而讀皇爲大。讀極爲中。則夫所謂惟大作中。大則受之。爲何等語乎。今以余說推之。則人君以眇然之身。履至尊之位。四方輻輳。面內而環觀之。自東而望者。不過此而西也。自南而望者。不過此而北也。此天下之至中也。旣居天下之至中。則必有天下之絕德。而後可以立至極之標準。故必順五行。敬五事。以脩其身。厚八政。協五紀。以齊其政。然後至極之標準。卓然有以立乎天下之至中。使夫面內而環觀者。莫不於是而取則焉。語其仁。則極天下之仁。而天下之爲仁者。莫能加也。語其孝。則極天下之孝。而天下之爲孝者。莫能尚也。是則所謂皇極者也。由是

而權之以三德審之以卜筮驗其休咎於天考其禍福於人如
挈裘領豈有一毛之不順哉此洛書之數所以雖始於一終於
九而必以五居其中洪範之疇所以雖本於五行究於福極而
必以皇極爲之主也若箕子之言有曰皇建其有極云者則以
言夫人君以其一身而立至極之標準於天下也其曰斂時五
福用敷錫厥庶民云者則以言夫人君能建其極則爲五福之
所聚而又有以使民觀感而化焉則是又能布此福而與其民
也其曰惟時厥庶民於汝極錫汝保極云者則以言夫民視君
以爲至極之標準而從其化則是復以此福還錫其君而使之
長爲至極之標準也其曰凡厥庶民無有淫朋人無有比德惟

皇作極云者。則以言夫民之所以能有是德者。皆君之德有以爲至極之標準也。其曰凡厥庶民。有猷有爲有守。汝則念之。不協於極。不罹於咎。皇則受之云者。則以言夫君既立極於上。而下之從化。或有淺深遲速之不同。其有謀者。有才者。有德者。人君固當念之而不忘。其或未能盡合而未抵乎大戾者。亦當受之而不拒也。其曰而康而色。曰予攸好德。汝則錫之福。時人斯其惟皇之極云者。則以言夫人之有能革面從君。而以好德自名。則雖未必出於中心之實。人君亦當因其自名而與之以善。則是人者。亦得以君爲極而勉其實也。其曰無虐於獨而畏高明人之有能有爲。使羞其行而邦其昌云者。則以言夫君之於

民一視同仁。凡有才能。皆使進善。則人才衆多。而國賴以興也。其曰凡厥正人。旣富方穀。汝弗能使有好於家。時人斯其辜。於其無好德。汝雖錫之福。其作汝用咎云者。則以言夫凡欲正人者。必先有以富之。然後可以納之於善。若不能使之有所賴於其家。則此人必將陷於不義。至其無復更有好德之心。而後始欲教之以脩身。勸之以求福。則已無及於事。而其起以報汝。唯有惡而無善矣。蓋人之氣稟。或清或濁。或純或駁。有不可以一律齊者。是以聖人所以立極乎上者。至嚴至密。而所以接引乎下者。至寬至廣。雖彼之所以化於此者。淺深遲速。其效或有不同。而吾之所以應於彼者。長養涵育。其心未嘗不一也。其曰

無偏無陂。遵王之義。無有作好。遵王之道。無有作惡。遵王之路。無偏無黨。王道蕩蕩。無黨無偏。王道平平。無反無側。王道正直。會其有極。歸其有極。云者。則以言夫天下之人。皆不敢徇其已之私。以從乎上之化。而會歸乎至極之標準也。蓋偏陂好惡者。已私之生於心者也。偏黨反側者。已私之見於事者也。王之義。王之道。王之路。上之化也。所謂皇極者也。遵義遵道。遵路。方會其極也。蕩蕩。平平。正直。則已歸於極矣。其曰皇極之敷言。是彝是訓。於帝其訓。云者。則以言夫人君以身立極。而布命於下。則其所以爲常爲教者。皆天之理。而不異乎上帝之降衷也。其曰凡厥庶民。極之敷言。是訓是行。以近天子之光。云者。則以言夫

天下之人於君所命皆能受其教而謹行之則是能不自絕遠而有以親被其道德之光華也其曰天子作民父母以爲天下王云者則以言夫人君能立至極之標準所以能作億兆之父毋而爲天下之王也不然則有其位無其德不足以首出庶物統御人羣而履天下之極尊矣是書也原於天之所以錫禹雖其茫昧幽眇有不可得而知者然箕子之所以言之而告武王者則已備矣顧其詞之宏深奧雅若有未易言者然嘗試虛心平氣而再三反復焉則亦坦然明白而無一字之可疑但先儒未嘗深求其意而不察乎人君所以脩身立道之本是以誤訓皇極爲大中又見其訓多爲含洪寬大之言因復誤認中爲含

糊苟且不分善惡之意殊不知極雖居中而非有合於中之義
且中之爲義又以其無過不及至精至當而無毫釐之差亦非
如其所指之云者乃以誤認之中爲誤認之極不謹乎至嚴至
密之體而務爲至寬至廣之量其弊將使人君不知脩身以立
教而墮於漢元帝之優游唐代宗之姑息卒至於是非顛倒賢
否貿亂而禍敗隨之而何斂福錫民之可望哉嗚呼孔氏則誠
誤矣然迹其本心亦曰姑以隨文解義爲口耳佔畢之計而已
不知其禍之至此耳自漢以來迄今千有餘年學士大夫不爲
不衆更歷世變不爲不多幸而遺經尚存本文可考其出於人
心者又不可得而昧也乃無一人覺其非是而一言以正之使

其患害流於萬世是則豈獨孔氏之罪哉予於是竊有感焉作
皇極辨

馮當可字時行蜀人博學能文其集中有封事云願陛下遠
便佞疎近習清心寡欲以臨事變此興事造業之根本洪範
所謂皇建其有極者也其論皇極深合鄙意然則予前所謂
千有餘年無一人覺其繆而正之者亦近誣矣但專經之士
無及之者而文士反能識豈汨沒傳注者不免於因
陋踵訛而平心誦味者有時而得之文字之外耶

詩集傳序

或有問於予曰詩何爲而作也予應之曰人生而靜天之性也
感於物而動性之欲也夫既有欲矣則不能無思既有思矣則
不能無言既有言矣則言之所不能盡而發於咨嗟咏嘆之餘
者必有自然之音響節族而不能已焉此詩之所以作也曰然

則其所以教者何也。曰：詩者，人心之感物而形於言之餘也。心之所感有邪正，故言之所形有是非。惟聖人在上，則其所感者無不正，而其言皆足以爲教。其或感之之雜，而所發不能無可擇者，則上之人必思所以自反，而因有以勸懲之，是亦所以爲教也。昔周盛時，上自郊廟朝廷，而下達於鄉黨閭巷，其言粹然無不出於正者。聖人固以協之聲律而用之，鄉人用之，邦國以化天下。至於列國之時，則天子巡狩，亦必陳而觀之，以行黜陟之典。降自昭穆而後，寢以陵夷。至於東遷而遂廢不講矣。孔子生於其時，旣不得位，無以行帝王勸懲黜陟之政，於是特舉其籍而討論之，去其重複，正其紛亂，而其善之不足以爲法，惡之

不足以爲戒者則亦刊而去之以從簡約示久遠使夫學者卽是而有以考其得失善者師之而惡者改焉是以其政雖不足以行於一時而其教實被於萬世是則詩之所以爲教者然也曰然則國風雅頌之體其不同若是何也曰吾聞之凡詩之所謂風者多出於里巷歌謠之作所謂男女相與詠歌各言其情者也惟周南召南親被文王之化以成德而人皆有以得其性情之正故其發於言者樂而不過於淫哀而不及於傷是以二篇獨爲風詩之正經自邶而下則其國之治亂不同人之賢否亦異其所感而發者有邪正是非之不齊而所謂先王之風者於此焉變矣若夫雅頌之篇則皆成周之世朝廷郊廟樂歌之

詞其語和而莊其義寬而密其作者往往聖人之徒固所以爲萬世法程而不可易者也至於雅之變者亦皆一時賢人君子閱時病俗之所爲而聖人取之其忠厚惻怛之心陳善閉邪之意尤非後世能言之士所能及之此詩之爲經所以人事決於下天道備於上而無一理之不具也曰然則其學之也當奈何曰本之二南以求其端參之列國以盡其變正之於雅以大其規和之於頌以要其止此學詩之大旨也於是乎章句以綱之訓詁以紀之諷詠以昌之涵濡以體之察之性情隱微之間審之言行樞機之始則脩身及家平均天下之道其亦不待他求而得之於此矣問者唯唯而退余時方輯詩傳因悉次是語以

冠其篇云

講禮記序說

某聞之學者博學乎先王六藝之文誦焉以識其辭講焉以通其意而無以約之則非學也故曰博學而詳說之將以反說約也何謂約禮是已禮者履也謂昔之誦而說者至是可踐而履也故夫子曰君子博學於文約之以禮顏子之稱夫子亦曰博我以文約我以禮禮之爲義不其大哉然古禮非必有經蓋先王之世上自朝廷下自閭巷其儀品有章動作有節所謂禮之實者皆踐而履之矣故曰禮儀三百威儀三千待其人而後行則豈必簡策而後傳哉其後禮廢儒者惜之乃始論著爲書以

傳於世。今禮記四十九篇。則其遺說已。學者求所以約之者。不可以莫之習也。今柯君直學。將爲諸君誦其說而講明之。諸君其聽之毋忽。

樂記動靜說

樂記曰。人生而靜。天之性也。感於物而動。性之欲也。何也。曰。此言性情之妙。人之所生而有者也。蓋人受天地之中以生。其未感也。純粹至善。萬理具焉。所謂性也。然人有是性。則卽有是形。有是形。則卽有是心。而不能無感於物。感於物而動。則性之欲者出焉。而善惡於是乎分矣。性之欲。卽所謂情也。又曰。物至而知。知而後好惡形焉。何也。曰。上言性情之別。此指情之動處爲

言而性在其中也。物至而知知之者。心之感也。好之惡之者。情也。形焉者。其動也。所以好惡而有自然之節者。性也。好惡無節於內。知誘於外。不能反躬。天理滅矣。何也。曰。此言情之所以流而性之所以失也。情之好惡。本有自然之節。惟其不自知覺。無所涵養。而大本不立。是以天則不明於內。外物又從而誘之。此所以流濫放逸而不自知也。苟能於此覺其所以然者。而反躬以求之。則其流也。庶乎其可制矣。不能如是。而惟情是徇。則人欲熾盛。而天理滅息。尚何難之有哉。此一節。正天理人欲之機。間不容息處。惟其反躬自省。念念不忘。則天理益明。存養自固。而外誘不能奪矣。夫物之感人。無窮。而人之好惡。無節。則是物

至而人化物也。人化物也者，滅天理而窮人欲，何也？曰：上言情之所以流，此以其流之甚而不反者言之也。好惡之節，天之所以與我也。而至於無節，宰制萬物，人之所以爲貴也。而反化於物焉。天理惟恐其存之不至也，而反滅之。人欲惟恐其制之不力也，而反窮之。則人之所以爲人者，至是盡矣。然天理秉彝終非可殄滅者。雖化物窮欲，至於此極，苟能反躬以求天理之本然者，則初未嘗滅也。但染習之深，難覺而易昧，難反而易流，非厲知恥之勇，而致百倍之功，則不足以復其初爾。

周禮三德說

或問師氏之官，以三德教國子。一曰至德，以爲道本。二曰敏德。

以爲行本。三曰孝德。以知逆惡何也。曰。至德云者。誠意正心。端本清原之事。道則天。人性命之理。事物當然之則。脩身齊家治國平天下之術也。敏德云者。強志力行。畜德廣業之事。行則理之所當爲。日可見之迹也。孝德云者。尊祖愛親。不忘其所由生之事。知逆惡。則以得於已者。篤實深固。有以真知彼之惡。逆而自不忍爲者也。凡此三者。雖曰各以其材品之高下。資質之所宜而教之。然亦未有專務其一而可以爲成人者也是以列而言之以見其相須爲用而不可偏廢之意。蓋不知至德則敏德者散漫無統。固不免乎篤學力行而不知道之譏。然不務敏德而一於至則無以廣業而有空虛之弊。不知敏德則孝德者僅爲

匹夫之行而不足以通於神明。然不務孝德而一於敏則又無以立本而有悖德之累。是以兼陳備舉而無所遺。此先王之教所以本末相資。精粗兩盡而不倚於一偏也。其又曰教三行。一曰孝行以親父母。二曰友行以尊賢良。三曰順行以事師長。何也。曰德也者。得於心而無所勉者也。行則其行之法而已。蓋不本之以其德。則無所自得而行不能以自脩。不實之以其行。則無所持循而德不能以自進。是以旣教之以三德而必以三行繼之。則雖其至末至粗亦無不盡。而德之脩也。不自覺矣。然是三者似皆孝德之行而已。至於至德敏德則無與焉。蓋二者之行本無常師。必協於一。然後有以獨見而自得之。固非教者所

得而預言也。唯孝德則其事爲可指。故又推其類而兼爲友順之目。以詳教之。以爲學者雖或未得於心。而事亦可得而勉。使其行之不已。而得於心焉。則進乎德而無待於勉矣。況其又能卽是而充之。以周於事。而泝其原則。孰謂至德敏德之不可至哉。或曰。三德之教。大學之學也。三行之教。小學之學也。鄉三物之爲教也。亦然而已。詳。

資治通鑑綱目序

先正溫國司馬文正公受詔編集資治通鑑。旣成。又撮其精要之語。別爲目錄三十卷。并上之。晚病。本書太詳。目錄太簡。更著舉要曆八十卷。以適厥中。而未成也。至紹興初。故侍讀南陽胡

文定公始復因公遺藁脩成舉要補遺若干卷則其文愈約而
事愈備矣然往者得於其家而伏讀之猶竊自病記識之弗彊
不能有以領其要而及其詳也故嘗過不自料輒與同志因兩
公四書別爲義例增損彙括以就此編蓋表歲以首年逐年之
上行外
書某甲子遇甲子字則朱書以別之雖無事依舉要以備歲年
而因年以著統凡正統之年
歲下大書非
正統者兩行分注大書以提要凡大書有正例有變例正例如始終興
廢災祥沿革及號令征伐殺生除拜之
大者變例如不在此例而善可而分注以備言凡分注有追原
其始者有遂言
爲法惡可爲戒者皆特書之也其終者有詳陳其事者有備載其言者有因始終而見者有因
拜罷而見者有因事類而見者有因家世而見者有溫公所立
之言所取之論有胡氏所收之說所著之評而兩公所遺
與夫近世大儒先生折衷之語今亦頗采以附於其間云使夫
歲年之久近國統之離合辭事之詳略議論之同異通貫曉析

如指諸掌名曰資治通鑑綱目凡若干卷藏之中筭姑以私便
檢閱自備遺忘而已若兩公述作之本意則有非區區所敢及
者雖然歲周於上而天道明矣統正於下而人道定矣大綱槩
舉而鑑戒昭矣衆目畢張而幾微著矣是則凡爲致知格物之
學者亦將慨然有感於斯而兩公之志或庶乎其可以默識矣
因述其指意條例如此列於篇端以俟後之君子云

讀唐志

歐陽子曰三代而上治出於一而禮樂達於天下三代而下治
出於二而禮樂爲虛名此古今不易之至論也然彼知政事禮
樂之不可不出於一而不知道德文章尤不可使出於二也夫

古之聖賢其文可謂盛矣。然初豈有意學爲如是之文哉。有是實於中。則必有是文於外。如天有是氣。則必有日月星辰之光耀。地有是形。則必有山川草木之行列。聖賢之心。既有是精明純粹之實。以磅礴充塞乎其內。則其著見於外者。亦必自然條理分明。光輝發越。而不可揜。蓋不必托於言語。著於簡冊。而後謂之文。但自一身接於萬物。凡其語嘿動靜。人所可得而見者。無所適而非文也。姑舉其最而言。則易之卦畫。詩之詠歌。書之記言。春秋之述事。與夫禮之威儀。樂之節奏。皆已列爲六經。而垂萬世。其文之盛。後世固莫能及。然其所以盛而不可及者。豈無所自來。而世亦莫之識也。故夫子之言曰。文王旣沒。文不在

茲乎蓋雖已決知不得辭其責矣。然猶若逡巡顧望而不能無所疑也。至於推其所以興衰。則又以爲是皆出於天命之所爲。而非人力之所及。此其體之甚重。夫豈世俗所謂文者所能當哉。孟軻氏沒。聖學失傳。天下之士。背本趨末。不求知道養德以充其內。而汲汲乎徒以文章爲事業。然在戰國之時。若申商孫吳之術。蘇張范蔡之辯。列禦寇莊周荀況之言。屈平之賦。以至秦漢之間。韓非李斯陸生賈傳董相史遷劉向班固。下至嚴安徐樂之流。猶皆先有其實。而後託之於言。惟其無本而不能一出於道。是以君子猶或羞之。及至宋玉相如王褒揚雄之徒。則一以浮華爲尚。而無實之可言矣。雄之太玄法言。蓋亦長楊較獵

之流而粗變其音節初非實爲明道講學而作也東京以降訖於隋唐數百年間愈下愈衰則其去道益遠而無實之文亦無足論韓愈氏出始覺其陋慨然號於一世欲去陳言以追詩書六藝之作而其弊精神糜歲月又有甚於前世諸人之所爲者然猶幸其略知不根無實之不足恃因是頗泝其源而適有會焉於是原道諸篇始作而其言曰根之茂者其實遂膏之沃者其光曄仁義之人其言藹如也其徒和之亦曰未有不深於道而能文者則亦庶幾其賢矣然今讀其書則其出於諂諛戲豫放浪而無實者自不爲少若夫所原之道則亦徒能言其大體而未見其有探討服行之效使其言之爲文者皆必由是以出

也。故其論古人則又直以屈原孟軻馬遷相如揚雄爲一等。而猶不及於董賈。其論當世之弊則但以辭不已出而遂有神祖聖伏之嘆。至於其徒之論亦但以剽掠僭竊爲文之病大振頹風。敎人自爲爲韓之功。則其師生之間傳受之際蓋未免裂道與文以爲兩物。而於其輕重緩急本末賓主之分又未免於倒懸而逆置之也。自是以來又復衰歇數十百年而後歐陽子出其文之妙蓋已不愧於韓氏。而其曰治出於一云者則自荀楊之下皆不能及。而韓亦未有聞焉。是則疑若幾於道矣。然考其終身之言與其行事之實則恐其亦未免於韓氏之病也。抑又嘗以其徒之說考之則誦其言者旣曰吾老將休付子斯文矣。

而又必曰。我所謂文。必與道俱。其推尊之也。旣曰。今之韓愈矣。而又必引夫文不在茲者。以張其說。繇前之說。則道之與文。吾不知其果爲一耶。果爲二耶。由後之說。則文王孔子之文。吾又不知其與韓歐之文。果若是其班乎否也。嗚呼。學之不講久矣。習俗之謬。其可勝言也哉。吾讀唐書而有感。因書其說以訂之。

答李方子

論六經不可求奇

聖賢見成事迹。一一可考而行。今日之求。若捨六經之外。求所謂玄妙之說。則無之。近世儒者。不將聖賢言語。爲切已可行之事。必於上面求新奇可喜之論。屈曲纏繞。詭秘變怪。不知聖賢之心。本不如此。旣以自欺。又轉相傳受。復以欺人。某嘗謂雖使

聖人復生亦只將六經語孟之所載者循而行之必不更有所作爲伏羲再出依前只畫八卦文王再出依前只衍六十四卦禹再出依前只是洪範九疇外此更有何差異事

答呂子約

論四書學問根本

今人讀書務廣而不求精是以刻苦者迫切而無從容之樂平易者泛濫而無精約之功兩者雖殊然其所以受病之源則一而已孟子中庸大學乃學問根本尤當專一致思以求其指意之所在乃或此或彼泛然讀之此則尤非所以審思明辨而究聖學之淵源也愚意此四書者當以序進每畢一書首尾通貫意味浹洽然後又易一書乃能有益其餘亦損其半然後可以

研味從容深探其立言之旨而無迫切泛濫之累也

答呂東萊

論讀易之法

讀易之法竊疑卦爻之詞本爲卜筮者斷而因以訓戒至象象
文言之作始因其吉凶訓戒之意而推說其義理以明之後人
但見孔子所說義理而不復推本文王周公之本意因鄙卜筮
爲不足言而其所以言易者遂遠於日用之實類皆牽合委曲
偏止一事而言無復包含該貫曲暢旁通之妙若但如此則聖
人當時自可別作一書明言義理以詔後世何用假托卦象爲
此艱深隱晦之辭乎故今凡欲讀一卦一爻便如占筮所得虛
心以求其詞義之所指以爲吉凶可否之決然後考其象之所

傳詩理要 卷十一
已然者求其理之所以然者然後推之於事使上自王公下至民庶所以脩身治國皆有可用私竊以爲如此求之似得三聖之遺意然方讀得上經其間方多有未曉處不敢強通也其可通處極有本甚平易淺近而今傳註誤爲高深微妙之說者凡此之類不一亦欲私識其說與朋友訂之而未能就也

答陳體仁

論詩爲樂而作之非

蒙別紙開示說詩之意尤詳因得以窺一二大者不敢自外敢以求於左右來教謂詩本爲樂而作故今學者必以聲求之則知其不苟作矣此論善矣然愚意有不能無疑者蓋以虞書攷之則詩之作本爲言志而已方其詩也未有歌也及其歌也未

有樂也以聲依永以律和聲則樂乃爲詩而作非詩爲樂而作也三代之時禮樂用於朝廷而不達於閭巷學者諷誦其言以求其志詠其聲執其器舞蹈其節以涵養其心則聲樂之所助於詩者爲多然猶曰興於詩成於樂其求之固有序矣是以凡聖賢之言詩主於聲者少而發其義者多仲尼所謂思無邪孟子所謂以意逆志者誠以詩之所以作本乎其志之所存然後詩可得而言也得其志而不得其聲者有矣未有不得其志而能通其聲者也就使得之止其鐘鼓之鏗鏘而已豈聖人樂云樂云之意哉況今去孔孟之時千有餘年古樂散亡無復可考而欲以聲求詩則未知古樂之遺聲今皆以推而得之乎三百

五篇皆可協之音律而被之絃歌已乎誠既得之則所助於詩多矣然恐未得爲詩之本也況未必可得則今之所講得無有畫餅之譏乎故愚意竊以爲詩出乎志者也樂出乎詩者也然則志者詩之本而樂者其末也未雖亡不害其本之存患學者不能平心和氣從容諷詠以求之情性之中耳有得乎此然後可得而言顧所得之淺深如何耳有舜文之德則聲爲律而身爲度簫韶二南之聲不患其不作此雖未易言然其理蓋不誣也不審以爲如何

答魏元履

論春秋先後之學

欲爲春秋學甚善但前輩以爲此乃學者最後一段事蓋自非

理明義精則止是較得失考同異心緒轉離與讀史傳撫故實無以異况如老兄心中本鬧恐非所以矯失而趨中也愚意以爲不若只看論語用年歲工夫却看證候淺深別作道理然但論語中看得有味餘經亦迎刃而解矣聖人之言平易中有精深處不可穿鑿求速成又不可苟且閒看過直須是置心平淡慤實之地玩味探索而虛恬省事以養之遲久不懈當自覺其益切不可輕易急迫之心求旦暮之功又不可因循偷惰虛度光陰也語錄中一兩段說此事處別紙上呈可見此非臆說亦見春秋之未易學也

答胡平一

論春秋書正之義

所喻三代正朔之說舊嘗疑此而深究之卒至於不可稽考而益重其所疑因置勿論今讀來喻考究雖詳然反復再三亦未有以釋其疑也如云周家記年必首十一月而春秋乃書春正月又云未嘗改月號以冬爲春假夏月而亂周典則未知春秋所謂春正月者其下所書之事爲建子月之事耶建寅月之事耶若云建子月事則春正月者豈非改月號而以冬爲春若云建寅月事則是用夏正月而亂周典矣安得云未嘗云如是耶前人蓋已見此不通故爲胡氏之學者爲之說曰春正月者夫子意在行夏之時而以建寅之月爲歲首也其下所書之事卽建子月之事無其位而不敢自專也如此則或可以不礙然

春秋所書之月。遂與月下之事常差兩月。則恐聖人作經。又不若是之紛更多事也。凡此之類。反復推說。儘有可通。亦儘有可難。雖嘗徧問前輩。亦未有決然堅定不可疑之說。竊謂讀書。凡若此類。與其求必通而陷於鑿。且又虛費日力。而無補於日用切已之功。則似不若闕之之爲愈也。

答李季章

論脩正儀禮之義

累年欲脩儀禮一書。釐析章句。而附以傳記。近方了得十許篇。似頗可觀。其餘度亦歲前可了。若得前此別無魔障。卽自此之後。便可塊然兀坐。以畢餘生。不復有世間念矣。元來典禮清訛。處古人都已說了。只是其書袞作一片。不成段落。使人難看。故

人不曾看便爲檢人舞文弄法迷國誤朝若梳洗得此書頭面出來令人易看則此輩無所匿其姦矣於世亦非少助也

答趙幾道

論近世讀史之失

昔時讀史者不過記其事實摭其詞采以供文字之用而已近世學者頗知其陋則變其法務以考其形勢之利害事情之得失而尤喜史遷之書講說推尊幾以爲賢於夫子寧舍論孟之屬而讀其書然嘗聞其說之一二不過只是戰國以下見識其正當處不過知尊孔氏而亦徒見其表悅其外之文而已其曰折衷於夫子者實未知所折衷也後之爲史者又不及此以故讀史之士多是意思粗淺於義理之精微多不能識而墮於尋

常之見以爲雖古聖賢亦不過審於利害之算而已。惟蘇黃門作古史序篇首便言古之聖人其於爲善如火之必熱水之必寒不爲不善如騶虞之不殺竊脂之不穀於義理大綱領處見得極分明提得極親切雖其下文未能盡善然只此數句已非近世諸儒所能及惜其從初爲學功夫本無次序不曾經歷不能見得本末一一諦當只是資質恬靜無他外慕故於此大頭段處窺測得箇影響到此地位正好着力却便墮落釋老門戶中去不能就聖賢指示處立得脩己治人正當規模以見諸事業傳之學者徒然說得此箇意思而其意之所重止在文字言語之間其徒雖極力推尊之然竟不曾有人拈出此箇話頭以

建立宗旨者亦可恨也。其論史遷之失，以爲淺近而不學疎略，而輕信此兩句，亦切中其膏肓。不知近日推尊史記者，曾略爲分解否。

答呂子約

論史記數事不足信

所論五帝紀所取多古文尚書及大戴禮爲主，爲所考信者。然伏羲神農見易大傳，乃孔聖之言，而八卦列於六經，爲萬世文字之祖，不知史遷何故乃獨遺而不錄，遂使史記一書，如人有身而無首。此尚爲知所考信者耶。太史公之洋洋美德，卽蘇黃門之騶虞竊脂，觀其下文全書，不知還撐拄得此數句起否。學者於聖人之道，徒習聞其外之文，而不考其中之實者，往往

類此王介甫所以惑主聽而誤蒼生亦只是此等語耳豈可以此便爲極至之談而躋之聖賢之列屬以斯道之傳哉以史遷能貶卜式與桑弘羊爲伍又能不與管仲李克爲深知功利之爲害不知六國表所謂世異變成功大議卑易行不必上古貨殖傳譏長貧賤而好語仁義爲可羞者又何謂耶伯夷傳辯許由事固善然其論伯夷之心正與求仁得仁者相反其視蘇氏之古史孰爲能考信於孔子之言耶謂遷言公孫弘以儒顯爲譏弘之不足爲儒不知果有此意否彼固謂儒者博而寡要勞而少功是以其事難盡從然則彼所謂儒者其意果何如耶所示數條不暇悉辯若以馬遷與班固並論則固不無優劣而其

書數十萬言。亦豈無好處。但論其大旨。則蘇氏兩語。恐史遷復生。不能自解免也。今乃諱其所短。慕其所長。以爲無一不合聖人之意。推尊崇獎。至與六經比隆。聞有議其失者。則淳淳然見於詞色。奮拳攘臂。欲起而折之一。何所見之低矮耶。

答曹子野

論史漢通鑑之疑

示及史記疑數條。某向曾攷證來了。功臣表與漢史功臣表。其戶數先後。及姓名多有不同。二史各有是非。當以傳實證之。不當全以史記所傳爲非真也。如淮陰爲連敖典客。漢史作票客。顏師古謂其票疾。而以賓客之禮禮之。夫淮陰之亡。以其不見禮於漢也。蕭何追之。而薦於漢王。始爲大將。若已以賓禮禮之。

淮陰何爲而亡哉。此則史記之所載爲是。三代表是其陳謬處。無可疑者。蓋他說行不得。若以爲堯舜俱出黃帝。是爲同姓之人。堯固不當以二女嬪于虞舜。亦豈容受堯二女。而安於同姓之無別。又以爲湯與王季同世。由湯至紂。凡十六傳。王季至武王。纔再世爾。是文王以十五世之祖。事十五世孫。紂。武王以十四世祖而代之。豈不甚謬戾耶。通鑑先後之不同者。却不必疑。史家敘事。或因時而記之。或因事而見之。田和遷康公。通鑑載於安王十一年。是因時而記之也。史記載於安王十六年。是因事而見之也。何疑之有。只有伐燕一節。史記以爲湣王。通鑑以爲宣王。史記却是攷他源流來。通鑑只是憑信孟子。溫公平生

不喜孟子。到此又却信之。不知其意如何。張敬夫說通鑑有未盡處。似此一節。亦是可疑。但二說今皆無所證。未知孰是孰非。更可反覆詳究。如有所見。却幸垂教。

朱子卷十二

後學西山張能麟纂輯

經史類

語錄

易

陰陽只是一氣陽之退便是陰之生不是陽退了又別有箇陰

生淳

陰陽有箇流行底有箇定位底一動一靜互爲其根便是流行底寒暑往來是也分陰分陽兩儀立焉便是定位底天地上下四方是也易有兩義一是變易便是流行底一是交易便

是對待底。魂魄以二氣言。陽是魂。陰是魄。以一氣言。則伸爲

魂。屈爲魄。義剛

陽氣只是六層。只管上去。上盡後。下面空缺處便是陰。方子

陰陽有以動靜言者。有以善惡言者。如乾元資始。坤元資生。則獨陽不生。獨陰不成。造化周流。須是並用。如履霜。堅冰至。則一陰之生。便如一賊。這道理在人如何看。直看是一般道理。

橫看是一般道理。所以謂之易。道夫

天地間無兩立之理。非陰勝陽。卽陽勝陰。無物不然。無時不然。

道夫

諸公且試看天地之間。別有甚事。只是陰與陽兩箇字。看是甚

麼物事都離不得。只就身上體看。纔開眼。不是陰。便是陽。密
拶拶在這裏。都不着得。別物事。不是仁。便是義。不是剛。便是
柔。只自家要做向前。便是陽。纔收退。便是陰。意思纔動。便是
陽。纔靜。便是陰。未消。別看。只是一動一靜。便是陰陽。伏羲只
因此畫卦。以示人。若只就一陰一陽。又不足以該衆理。於是
錯綜爲六十四卦。三百八十四爻。初只是許多卦爻。後來聖
人又繫許多辭在下。如他書則元有這事。方說出這箇道理。
易則未曾有此事。先假託都說在這裏。如書便有箇堯舜。有
箇禹湯。文武周公出來做許多事。便說許多事。今易則元未
曾有聖人。預先說出。待人占考。大事小事。無一能外於此。聖

人大抵多是垂戒

賀孫

今學易非必待遇事而占方有所戒只平居玩味看他所說道
理於自家所處地位合是如何故云居則觀其象而玩其辭
動則觀其變而玩其占孔子所謂學易正是平日常常學之
想見聖人之所謂讀異乎人之所謂讀想見曾中洞然於易
之理無纖毫蔽處故云可以無大過

賀孫

易中說到那陽處便扶助推移他到陰處便抑遏壅絕他

淵

問理與數其本也只是一曰氣便是數有是理便有是氣有是
氣便有是數物物皆然如水數六雪片也六出這又不是去
做將出來他是自恁地如那龜聖人所以獨取他來用時也

是這箇物事分外靈。嘗有朋友將龜殼來看。背上中心有五條文。出去成八。外面又成二十四。皆是自然。恁地這又未爲巧。最是七八九六。與一二三四極巧。一是太陽。餘得箇九在後面。二是少陰。後面便是八。三是少陽。後面便是七。四是太陰。後面便是六。無如此恰好。這皆是造化自然如此。都過他不住。義剛

某嘗問季通。康節之數。伏羲也曾理會否。曰。伏羲須理會過。某以爲不然。伏羲只是據他見得一箇道理。恁地便畫出幾畫。他也那裏知得。疊出來恁地巧。此伏羲所以爲聖。若他也恁地逐一推排。便不是伏羲天然意思。史記曰。伏羲至淳厚。作

易八卦。那裏恁地巧安排。賀孫

季通云。天下之萬聲。出於一闔。一闢。天下之萬理。出於一動。一靜。天下之萬數。出於一奇。一耦。天下之萬象。出於一方。一圓。一盡。只起於乾坤二畫。端蒙

易爲卜筮而作。皆因吉凶以示訓戒。故其言雖約而所包甚廣。夫子作傳。亦略舉一端以見凡例而已。

取象各不同。有就自己身上取底。有自己當不得這卦象。却就那人身上取。如潛龍勿用。是就占者身上言。到那見龍自家便當不得。須把做在上之大人。九五飛龍。便是人君大人。却是在下之大人。淵

須是將伏羲畫底卦做一樣看。文王卦做一樣看。文王周公說底象象做一樣看。孔子說底做一樣看。王輔嗣伊川說底各做一樣看。伏羲是未有卦時畫出來。文王是就那見成底卦邊說。畫前有易。真箇是恁地。這箇卦是畫不迭底。那許多都在這裏了。不是畫了一畫。又旋思量一畫。才一畫時。畫畫都具。淵

康節易數出於希夷。他在靜中推見得天地萬物之理如此。又與他數合。所以自樂。今道藏中有此卦數。德明

已前解易多只說象數。自程門以後。人方都作道理說了。礪易傳明白無難看。但伊川以天下許多道理散入六十四卦中。

若作易看。卽無意味。唯將來作事看。卽句句字字有用處。夫道
易傳義理精。字數足。無一毫欠闕。他人著工夫補綴。亦安得如
此自然。只是於本義不相合。易本是卜筮之書。卦辭爻辭。無
所不包。看人如何用。程先生只說得一理。

至微者理也。至著者象也。體用一原。顯微無間。觀會通以行其
典禮。則辭無所不備。此是一箇理。一箇象。一箇辭。然欲理會
理與象。又須辭上理會。辭上所載。皆觀會通以行其典禮之
事。凡於事物。須就其聚處理會。尋得一箇通路行去。若不尋
得一箇通路。只驀地行去。則必有礙。典禮只是常事。會是事
之合聚。交加難分別處。如庖丁解牛。固是奏刀騞然。莫不中

節若至那難處便着些氣力方得通故莊子又說雖然每至
於族吾見其難爲怵然爲戒視爲止行爲遲莊子說話雖無
頭當然極精巧說得到今學者却於辭上看觀其會通以行
典禮也賀孫

問讀易未能浹洽何也曰此須是此心虛明寧靜自然道理流
通方包羅得許多義理蓋易不比詩書他是說盡天下後世
無窮無盡底事理只一兩字便是一箇道理又人須是經歷
天下許多事變讀易方知各有一理精審端正今旣未盡經
歷非是此心大段虛明寧靜如何見得此不可不自勉也錄

看易須是看他卦爻未畫以前是怎模樣却就這上見得他許

多卦爻象數是自然如此。不是杜撰。且詩則因風俗世變而作書則因帝王政事而作。易初未有物。只是懸空說出。當其未有卦畫。則渾然一太極在人。則是喜怒哀樂未發之中。一旦發出。則陰陽吉凶。事事都有在裏面。人須是就至虛靜中。見得這道理。周遮通瓏方好。若先靠定一事說。則滯泥不通了。此所謂潔靜精微。易之教也。學履

伊川不取卦變之說。至柔來而文剛剛。自外來而爲主於內。諸處皆牽強說了。王輔嗣卦變又變得不自然。某之說却覺得有自然氣象。只是換了一爻。非是聖人合下作卦如此。自是卦成了。自然有此象。獨

問橫渠說易爲君子謀不爲小人謀蓋自太極一判而來便已如此了。曰論其極是如此然小人亦具此理只是他自反悖了。君子治之不過卽其固有者以正之而已。易中亦有時而爲小人謀如包承小人吉大人否亨言小人當否之時能包承君子則吉。但此雖爲小人謀乃所以爲君子謀也。廣

京房輩說數捉他那影象才發見處便筭將去。且如今日一箇人來相見便就那相見底時節筭得這箇是好人不好人用得極精密他只是動時便筭得靜便筭不得人問康節庭前樹筭得否康節云也筭得須是待他動時方可須臾一葉落他便就這裏筭出這樹是甚時生在甚時死。淵

太玄中高處只是黃老故其言曰老子之言道德吾有取焉

方

太玄之說只是老莊康節深取之者以其書亦挾旁陰陽消長

來說道理

必大

自晉以來解經者却改變得不同如王弼郭象輩是也漢儒解

經依經演繹晉人則不然捨經而自作文

方子

日家四廢之說溫公潛虛只此而已

替

潛虛後截是張行成續不押韻見得

閔祖

歐陽公所以疑十翼非孔子所作者他童子問中說道仰以觀

於天文俯以察於地理又說河出圖洛出書聖人則之只是

說作易一事如何有許多般樣又疑後面有許多子曰既言

子曰則非聖人自作這箇自是他曉那面前道理不得了却只去這上面疑他所謂子曰者往往是弟子後來旋添入亦不可知近來胡五峰將周子通書盡除去了篇名却去上面各添一箇周子曰此亦可見其比淵

廖氏論洪範篇大段闕河圖洛書之事以此見知於歐陽公蓋歐公有無祥瑞之論歐公只見五代有偽作祥瑞故併與古而不信如河圖洛書之事論語自有此說而歐公不信祥瑞併不信此而云繫辭亦不足信且如今世間有石頭上出日月者人取爲石屏又有一等石上分明有如枯樹者亦不足信也河圖洛書亦何足信義剛

老蘇說易專得於愛惡相攻而吉凶生以下三句他把這六爻似那累世相讎相殺底人相似看這一爻攻那一爻這一畫克那一畫全不近人情東坡見他恁地太龌龊却添得些佛老在裏面其書自做兩樣亦間有取王輔嗣之說以補老蘇之說亦有不曉他說了亂填補處老蘇說底亦有去那物理上看得着處

淵

浩問李壽翁最好麻衣易與關子明易如何先生笑曰偶然兩書皆是偽書關子明易是阮逸作陳無已集中說得分明麻衣易乃是南康戴主簿作某知南康時尚見此人已垂老却

也讀書博記

浩

繫辭或言造化以及易或言易以及造化不出此理

上下繫辭說那許多交直如此分明他人說得分明便淺近聖人說來却不淺近有含蓄所以分在上下繫也無甚意義聖人偶然去這處說又去那處說嘗說道看易底不去理會道理却只去理會這般底譬如讀詩者不去理會那四字句押韻底却去理會十五國風次序相似

尚書

至之問書斷自唐虞以下須是孔子意曰也不可不知且如三皇之書言大道有何不可便刪去五帝之書言常道有何不可便刪去皆未可曉

道夫

陳仲蔚問三皇所說甚多當以何者爲是曰無理會且依孔安國之說五峯以爲天皇地皇人皇而伏羲神農黃帝堯舜爲五帝却無高辛顓頊要之也不可便如此說

義剛

問林少穎說盤誥之類皆出伏生如何曰此亦可疑蓋書有古文有今文今文乃伏生口傳古文乃壁中之書禹謨說命高宗彤日西伯戡黎泰誓等篇凡易讀者皆古文况又是科斗書以伏生書字文攷之方讀得豈有數百年壁中之物安得不訛損一字又却是伏生記得者難讀此尤可疑今人作全書解必不是

大雅

書有易曉者恐是當時做底文字或是曾經脩飾潤色來其難

曉者恐只是當時說話。蓋當時人說話自是如此。當時人自曉得。後人乃以爲難曉耳。若使古人見今之俗語。却理會不得也。以其間頭緒多。若去做文字時說不盡。故只直記其言語而已。廣

安卿問何緣無宣王書。曰是當時偶然不曾載得。又聞康王何緣無詩。曰某切以昊天有成命之類便是。康王詩而今人只是要解那成王做王業後便不可曉。且如左傳不明說作成王詩。後韋昭又且費盡氣力要解從那王業上去。不知怎生地。義剛

問致知讀書之序。曰須先看大學。然六經亦皆難看。所謂聖人

有郢書後世多燕說是也。如尚書收拾於殘闕之餘。却必要句句義理相通。必至穿鑿。不若且看他分明處。其他難曉者。姑闕之可也。程先生謂讀書之法。當平其心。易其氣。闕其疑。是也。且先看聖人大意。未須便以己意參之。如伊尹告太甲。便與傳說告高宗不同。伊川之言。諄切。愧到。蓋太甲資質低。不得不然。若高宗則無許多病痛。所謂黷于祭祀。時謂弗欽之類。不過此等小事。爾學者亦然。看得自己病痛大。則如伊尹之言。正用得着。蓋有這般病。須是這般藥。讀聖賢書。皆要體之於己。每如此。謨

二典三謨。其言奧雅。學者未遽曉會。後面盤詰等篇。又難看。且

如商書中伊尹告太甲五篇說得極切其所以治心脩身處
雖爲人主言然初無貴賤之別宜取細讀極好今人不於此
等處理會却只理會小序某看得書小序不是孔子作只是
周秦間低手人作然後人亦自理會他本義未得且如臯陶
矢厥謨禹成厥功帝舜申之申重也序者本意先說臯陶後
說禹謂舜欲令禹重說故將申字係禹字蓋伏生書以益稷
合於臯陶謨而思曰贊贊襲哉與帝曰來禹汝亦言禹拜
曰兪帝予何言予思曰孜孜相連申之二字便見是舜令禹
重言之意此是序者本意今人都不如此說說得雖多皆非
其本意也

錄

問讀尚書欲求諸家說觀之如何先生歷舉王蘇程陳林少穎李叔易十餘家解訖却云便將衆說看未得且讀正文見箇意思了方可如此將衆說看必大

孔氏書序不類漢文似李陵答蘇武書因問董仲舒三策文氣亦弱與鼂賈諸人文章殊不同何也曰仲舒爲人寬緩其文亦如其人大抵漢自武帝後文字要入細皆與漢初不同必大諸家注解其說雖有亂道若內只有一說是時亦須還他底是尚書句讀王介甫蘇子瞻整頓得數處甚是見得古注全然錯然舊看郭象解莊子有不可曉處後得呂吉甫解看却有說得文義的當者菴

四岳只是一人四岳是總十二牧者百揆是總九官者義剛

問四岳是十二牧之長否曰周官言內有百揆四岳則百揆是

朝廷官之長四岳乃管領十二牧者四岳通九官十二牧爲

二十有二人則四岳爲一人矣又堯咨四岳以汝能庸命異

朕位不成堯欲以天下與四人也又周官一篇說三公六卿

甚分曉漢儒如楊雄鄭康成之徒以至晉杜元凱皆不會見

直至東晉此書方出伏生書多說司馬司空乃是諸侯三卿

之制故其誥諸侯多引此顧命排列六卿甚整齊太保奭家宰

芮伯宗伯彤伯司馬畢公司徒衛侯司寇毛公司空疏中言之甚詳康誥

多言刑罰事爲司寇也太保畢公毛公乃以三公下行六卿

之職三公本無職事亦無官屬但以道義輔導天子而已漢
却以司徒司馬司空爲三公失其制矣

人傑

仲默集注尚書至肇十有二州因云禹卽位後又并作九州曰
也見不得但後面皆只說帝命式於九圍以有九有之師不
知是甚時又復并作九州

義剛

法家者流往往常患其過於慘刻今之士大夫恥爲法官更相
循襲以寬大爲事於法之當死者反求以生之殊不知明于
五刑以弼五教雖舜亦不免教之不從刑以督之懲一人而
天下人知所勸戒所謂辟以止辟雖曰殺之而仁愛之實已
行乎中今非法以求其生則人無所懲懼陷於法者愈衆雖

曰仁之適以害之

道夫

禹當時治水也只理會河患餘處亦不大段用工夫河水之行不得其所故汎濫浸及他處觀禹用功初只在冀以及交青徐雍却不甚來東南積石龍門所謂作十三載乃同者正在此處龍門至今橫石斷流水自上而下其勢極可畏向未經鑿治時龍門正道不甚泄故一派西袞入關陝一派東袞往河東故此爲患最甚禹自積石至龍門着工夫最多又其上散從西域去往往亦不甚爲患行河東者多流黃泥地中故只管推洗泥汁只管疑滯淤塞故道漸狹值上流下來纔急故道不泄便致橫湍他處先朝亦多造鐵爲治河器竟亦何

濟或問齊威塞九河以富國事果然否曰當時葵丘之會申
五禁且曰無曲防是令人不得私自防遏水流他終不成自
去塞了最利害處便是這般說話亦難憑問河患何爲至漢
方甚曰史記表中亦自有河決之文禹只是理河水餘處亦
因河溢有些患看治江不見甚用力書載岷山導江東別爲
沱東至于澧過九江至于東陵東迤北會于匯東爲中江入
于海若中間使用工夫如何載得恁畧又云禹治水先就土
低處用工賀孫

因說三江之說多不同銖問東坡之說如何曰東坡不會親見
東南水勢只是意想硬說且江漢之水到漢陽軍已合爲一

不應至揚州復言三江薛士龍說震澤下有三江入海疑他
會見東南水勢說得恐是因問味別地脉之說如何曰禹治
水不知是要水有所歸不爲民害還是只要辨味點茶如陸
羽之流尋脉踏地如後世風水之流耶且太行山自西北發
脉來爲天下之脊此是中國大形勢其底柱王屋等山皆是
太行山脚今說者分陰陽列言道岍及岐至于荆山山脉逾
河而過爲壺口雷首底柱析城王屋碣石則是荆山地脉却
來做太行山脚其所謂地脉尚說不通况禹貢本非理會地
脉耶

銖

禹貢西方南方殊不見禹施工處緣是山高少水患當時只分

遣官屬而不了事底記述得文字不整齊耳某作九江彭蠡
辯禹貢大槩可見於此禹貢只載九江無洞庭今以其地驗
之有洞庭無九江則洞庭之爲九江無疑矣洞庭彭蠡冬月
亦涸只有數條江水在其中義剛

問岷山之分支何以見曰只是以水驗之大凡兩山夾行中間
必有水兩水夾行中間必有山江出於岷山岷山夾江兩岸
而行那邊一支去爲隴這邊一支爲湖南又一支爲建康又
一支爲兩浙而餘氣爲福建二廣義剛

因說禹貢曰此最難說蓋他本文自有繆誤處且如漢水自是
從今漢陽軍入江下至江州然後江西一帶江水流合大

江兩江下水相淤故江西水出不得溢爲彭蠡上取漢水入江處有多少路今言漢水過三溼至于大別南入于江東匯澤爲彭蠡全然不合又如何去強解釋得蓋禹當時只治得雍冀數州爲詳南方諸水皆不親見恐只是得之傳聞故多遺闕又差誤如此今又不成說他聖人之經不是所以難說然自古解釋者紛紛終是與他地上水不合又言孟子說淪濟潔而注諸海決汝漢排淮泗而注諸江據今水路及禹貢所載惟漢入江汝泗自入淮而淮自入海分明是誤蓋一時牽於文勢而不暇攷其實耳今人從而強爲之解釋終是可笑

笑雉

問銖理會得彭蠡否。銖曰：向來只據傳註終未透達。曰：細看來經文疑有差誤。恐禹當初必是不曾親到江東西。或遣官屬往視。又是時二苗頑弗卽工。據彭蠡洞庭之地。往往看得亦不予細。因出二江說并山海經二條云：此載得甚實。又云：浙江源疑出今婺源折嶺下。銖

孔安國以衷爲善。便無意思。衷只是中。便與民受天地之中一般。沫

夢之事只說到感應處。高宗夢帝賚良弼之事。必是夢中有帝賚之說之類。只是夢中事說是帝真賚不得說。無此事只是天理亦不得。揚

經籍古人言學字方自說命始有

說洪範看來古人文字也不被人牽強說得出只自恁地熟讀少間字字都自會着實又云今人只管要說治道這是治道最緊切處這箇若理會不通又去理會甚麼零零碎碎

道夫

問洪範諸事曰此是箇大綱目天下之事其大者大槩備於此矣問皇極曰此是人君爲治之心法如周公一書只是箇八政而已

備

忽問如何是金曰從革對曰是從已之革曰不然是或從或革耳從者從所鍛制革者又可革而之他而其堅剛之質依舊自存故與曲直稼穡皆成雙字炎上者上字當作上聲潤下

者下字當作去聲亦此意

大雅

伯模云老蘇著洪範論不取五行傳而東坡以爲漢儒五行傳不可廢此亦自是旣廢則後世有忽天之心先生曰漢儒也穿鑿如五事一事錯則皆錯如何却云聽之不聰則某事應貌之不恭則某事應

道夫

又問箕星好風畢星好雨曰箕只是簸箕以其簸揚而鼓風故月宿之則風古語云月宿箕風揚沙畢是又網漉魚底又子又鼎中漉肉又子亦謂之畢凡以畢漉魚肉其汁水淋漓而下若雨然畢星名義蓋取此今畢星上有一柄下開兩叉形狀亦類畢故月宿之則雨漢書謂月行東北入軫若東南入

箕則風所以風者。蓋箕是南方屬巽。巽爲風。所以好風。恐未必然。個

因言武王旣克紂。武庚三監及商民畔。曰。當初紂之暴虐天下之人。胥怨。無不欲誅之。及武王旣順天下之心。以誅紂。於是天下之怨。皆解而歸周矣。然商之遺民。及與紂同事之臣。一旦見故主遭人殺戮。宗社爲墟。寧不動心。茲固畔心之所由生也。蓋始苦於紂之暴。而欲其亡。固人之心。及紂旣死。則怨已解。而人心復有所不忍。亦事勢人情之必然者。又况商之流風善政。畢竟尚有在人心者。及其頑民感紂恩意之深。此其所以畔也。後來樂毅伐齊。亦是如此。個

國秀問穆王去文武成康時未遠風俗人心何緣如此不好曰
天下自有一般不好底氣象聖人有那禮樂刑政在此維持
不好底也能革面至維持之具一有廢弛處那不好氣質便
自各出來和那革面底都無了所以恁地不好人之學問逐
日恁地恐懼脩省得恰好纔一日放倒便都壞了

格

詩經

只是思無邪一句好不是一部詩皆思無邪

振

問刪詩曰那會見得聖人執筆刪那箇存這箇也只得就相傳

上說去

賀孫

問王風是他風如此不是降爲國風曰其辭語可見風多出於

在下之人雅乃士夫所作雅雖有刺而其辭莊重與風異

可學

大序言一國之事係一人之本謂之風所以析衛爲邶鄘衛曰詩古之樂也亦如今之歌曲音各不同衛有衛音邶有邶音鄘有鄘音故詩有邶音者係之邶有鄘音者係之鄘若大雅小雅則亦如今之商調宮調作歌曲者亦按其腔調而作爾大雅小雅亦古作樂之體格按大雅體格作大雅按小雅體格作小雅非是做成詩後旋相度其辭目爲大雅小雅也大抵國風是民庶所作雅是朝廷之詩頌是宗廟之詩又云小序漢儒所作有可信處絕少大序好處多然亦有不滿人意處

去偽

詩有是當時朝廷作者雅頌是也若國風乃採詩者採之民間以見四方民情之美惡二南亦是採民言而被樂章爾程先生必要說是周公作以教人不知是如何某不敢從若變風又多淫亂之詩故班固言男女相與歌詠以言其傷是也聖人存此亦以見上失其教則民欲動情勝其弊至此故曰詩可以觀也

大雅

林子武問詩者中聲之所止曰這只是正風雅頌是中聲那變風不是伯恭堅要牽合說是然恐無此理今但去讀看便自有那輕薄底意思在了如韓愈說數句其聲浮且淫之類這正是如此

義剛

或問詩六義注三經三緯之說曰三經是賦比興是做詩底骨
子無詩不有才無則不成詩蓋不是賦便是比不是比便是
興如風雅頌却是裏面橫弗底都有賦比興故謂之三緯煮

詩大序亦只是後人作其間有病句

方子

大序亦有未盡如發乎情止乎禮義又只是說正詩變風何嘗

止乎禮義

振

問止乎禮義曰如變風柏舟等詩謂之止乎禮義可也桑中諸
篇曰止乎禮義則不可蓋大綱有止乎禮義者

替

詩序東漢儒林傳分明說道是衛宏作後來經意不明都是被
他壞了某又看得亦不是衛宏一手作多是兩三手合成一

序愈說愈疎浩云蘇子由却不取小序曰他雖不取下面言語留了上一句便是病根伯恭專信序又不免牽合伯恭凡百長厚不肯非毀前輩要出脫回護不知道只爲得箇解經人却不曾爲得聖人本意是便道是不是便道不是方得浩問詩傳多不解詩序何也曰某自二十歲時讀詩便覺小序無意義及去了小序只玩味詩詞却又覺得道理貫徹當初亦嘗質問諸鄉先生皆云序不可廢而某之疑終不能釋後到三十歲斷然知小序之出於漢儒所作其爲繆戾有不可勝言東萊不合只因序講解便有許多牽強處某嘗與之言終不肯信讀詩記中雖多說序然亦有說不行處亦廢之某因

作詩傳遂成詩序辨說一冊其他繆戾辨之頗詳

燁

器之間詩曰古人情意溫厚寬和道得言語自恁地好當時叶韻只是要便於諷詠而已到得後來一向於字韻上嚴切却無意思漢不如周魏晉不如漢唐不如魏晉本朝又不如唐如元微之劉禹錫之徒和詩猶自有韻相重密本朝和詩便定不要一字相同不知却愈壞了詩

木之

詩中頭項多一項是音韻一項是訓詁名件一項是文體若逐一根究然後討得些道理則殊不濟事須是通悟者方看得方子

聖人有法度之言如春秋書禮是也一字皆有理如詩亦要逐

字將理去讀便都礙了

亭

公不會看詩須是看他詩人意思好處是如何不好處是如何看他風土看他風俗又看他人情物態只看伐檀詩便見得他一箇清高底意思看碩鼠詩便見他一箇暴歛底意思好底意思是如此不好底是如彼好底意思令自家善意油然而感動而興起看他不好底自家心下如着槍相似如此看方得詩意個

學者當興於詩須先去了小序只將本文熟讀玩味仍不可先看諸家注解看得久之自然認得此詩是說箇甚事謂如拾得箇無題目詩說此花旣白又香是盛寒開必是梅花詩也

卷阿召康公戒成王其始只說箇好意思如豈弟君子皆指成王純嘏爾壽之類皆說優游享福之事至有馮有翼以下方說用賢大抵告人之法亦當如此須先令人歆慕此事則其肯從吾言必樂爲之矣

人傑

讀詩之法只是熟讀涵味自然和氣從胷中流出其妙處不可得而言不待安排措置務自立說只恁平讀着意思自足須是打疊得這心光蕩蕩地不立一箇字只管虛心讀他少間推來推去自然推出那箇道理所以說以此洗心便是以這道理盡洗出那心裏物事渾然都是道理上蔡曰學詩須先識得六義體面而諷味以得之此是讀詩之要法看來書只

是要讀得熟時道理自見。切忌先自布置立說。偶

漢書傳訓皆與經別行。三傳之文不與經連。故石經書公羊傳皆無經文。藝文志云毛詩經二十九卷。毛詩詁訓傳三十卷。是毛爲詁訓亦不與經連也。馬融爲周禮注乃云欲省學者兩讀。故具載本文。然則後漢以來始就經爲注。未審此詩引經附傳是誰爲之。其毛詩二十九卷不知併何卷也。

問讀詩記序中雅鄭邪正之說未明。曰向來看詩中鄭詩邶鄘衛詩便是鄭衛之音。其詩大段邪淫。伯恭直以謂詩皆賢人所作皆可歌之。宗廟用之賓客此甚不然。如國風中亦多有邪淫者。又問思無邪之義。曰此只是三百篇可蔽以詩中此

言所謂無邪者。讀詩之大體。善者可以勸。而惡者可以戒。若以爲皆賢人所作。賢人決不肯爲此。若只一鄉一里中有箇恁地人。專一作此怨刺。恐亦不靜。至於皆欲被之絃歌。用之宗廟。如鄭衛之詩。豈不褻瀆。用以祭幽厲。褒姒可也。施之賓客燕饗。亦待好賓客不得。須衛靈陳幽乃可耳。所謂詩可以興者。使人興起。有所感發。有所懲創。可以觀者。見一時之習俗如此。所以聖人存之。不盡刪去。便盡見當時風俗。媿惡非謂皆賢人所作耳。大序說止乎禮義。亦可疑。小序尤不可信。皆是後人託之。仍是不識義理。不曉事。如山東學究者。皆是取之左傳史記中所不取之君。隨其謚之美惡。有得惡謚及

傳中載其人之事者凡一時惡詩盡以歸之最是鄭忽可憐
凡鄭風中惡詩皆以爲刺之伯恭又欲主張小序煅煉得鄭
忽罪不勝誅鄭忽却不是狡若是狡時他却須結齊國之援
有以鉗制祭仲之徒決不至於失國也謚法中如墮覆社稷
曰頃便將柏舟一詩硬差排爲衛頃公便云賢人不遇小
人在側更無分疏處愿而無立曰僖衡門之詩便以誘陳僖
愿而無立志言之如子衿則是淫奔之詩豈是學校中氣象
褻詩中子惠思我褻裳涉漆至狂童之狂也且豈不是淫奔
之辭只緣左傳中韓宣子引豈無他人便將做國人思大國
之正已不知古人引詩但借其言以寓已意初不理會上下

文義偶一時引之耳。伯恭只詩綱領第一條便載上蔡之說。上蔡費盡辭說。只解得箇怨而不怒。纔先引此。便是先瞎了
一部文字眼目。啓

某解詩多不依他序。縱解得不好。也不過只是得罪於作序之人。只依序解而不攷本詩上下文意。則得罪於聖賢也。揚

關雎一詩。文理深奧。如乾坤卦一般。只可熟讀詳味。不可說。卓
解詩如抱橋柱浴水一般。終是離脫不得。鳥獸草木。今在眼前。
識得底。便可窮究。且如雎鳩。不知是箇甚物。亦只得從他古。
說道是鷺而有別之類。

問幽詩本風。而周禮篇章氏祈年於田祖。則吹豳雅。蜡祭息老。

物則吹豳頌不知就豳詩觀之其孰爲雅孰爲頌曰先儒因
此說而謂風中自有雅自有頌雖程子亦謂然似都壞了詩
之六義然有三說一說謂豳之詩吹之其調可以爲風可爲
雅可爲頌一說謂楚茨大田甫田是豳之雅噫嘻載芟豐年
諸篇是豳之頌謂其言田之事如七月也如王介甫則謂豳
之詩自有雅頌今皆亡矣數說皆通恐其或然未敢必也道
問古者改正朔如以建子月爲首則謂之正月抑只謂之十一
月曰此亦不可攷如詩之月數卽今之月孟子七八月之間
旱乃今之五六月十一月徒杠成十二月輿梁成乃今之九
十月國語夏令曰九月成梁十月成梁卽孟子之十一月十

二月若以爲改月則與孟子春秋相合而與詩書不相合若以爲不改月則與詩書相合而與孟子春秋不相合如秦元年以十月爲首末又有正月又似不改月

義剛

問東萊曰十月而曰改歲三正之通于民俗尚矣周特舉而迭用之耳據詩如七月流火之類是用夏正一之日感發之類是周正卽不見其用商正而呂氏以爲舉而迭用之何也曰周歷夏商其未有天下之時固用夏商之正朔然其國僻遠無純臣之義又自有私紀其時月者故三正皆曾用之也

時舉

小雅恐是燕禮用之大雅須饗禮方用小雅施之君臣之間大

雅則止人君可歌

必大

周家初興時周原膺膺董荼如飴苦底物事亦甜及其衰也泔羊墳首三星在罍人可以食鮮可以飽直恁地蕭索

文蔚

大雅非聖賢不能爲其間平易明白正大光明

笛

問我將乃祀文王於明堂之樂章詩傳以爲物成形於帝人成形於父故季秋祀帝於明堂而以父配之取其成物之時也此乃周公以義起之非古禮也不知周公以後將以文王配耶以時王之父配耶曰諸儒正持此二議至今不決看來只得以文王配且周公所制之禮不知在武王之時在成王之時若在成王則文王乃其祖也亦自可見又問繼周者如何曰只得以有功之祖配之

個

孝經

因說孝經是後人綴緝問此與尚書同出孔壁曰自古如此說
且要理會道理是與不是適有問重卦并象象者某答以且
理會重卦之理不必問此是誰作彼是誰作

士毅

問郊祀后稷以配天宗祀文王於明堂以配上帝此說如何曰
此自是周公創立一箇法如此將文王配明堂未爲定例以
后稷推之自可見後來妄將嚴父之說亂了

賜

問配天配上帝帝只是天天只是帝却分祭何也曰爲壇而祭
故謂之天祭於屋下而以神祇祭之故謂之帝

寓

春秋

春秋大旨其可見者誅亂臣討賊子內中國外夷狄貴王賤霸而已未必如先儒所言字字有義也想孔子當時只是要備二三百年的事故取史文寫在這裏何嘗云某事用某法某事用某例邪且如書會盟侵伐大意不過見諸侯擅興自肆耳書郊禘大意不過見魯僭禮耳至如三卜四卜牛傷牛死是失禮之中又失禮也不郊猶三望是不必望而猶望也如書仲遂卒猶繹是不必繹而猶繹也如此等義却自分明近世如蘇子由呂居仁却看得平

閔祖

春秋有書天王者有書王者此皆難曉或以爲王不稱天貶之某謂若書天王其罪自見寧啗以爲冢宰亦未敢信其他如

莒去疾莒展與齊陽生恐只據舊史文若謂添一箇字減一箇字便是褒貶某不敢信威公不書秋冬史闕文也或謂貶天王之失刑不成議論可謂亂道夫子平時稱顏子不遷怒不貳過至作春秋却因惡魯威而及天子可謂桑樹着刀穀樹汁出者魯威之弑天王之不能討罪惡自著何待於去秋冬而後見乎又如貶滕稱子而滕遂至於終春秋稱子豈有此理今朝廷立法降官者猶經赦敘復豈有因滕子之朝威遂併其子孫而降爵乎

人傑

春秋所書如某人爲某事本據魯史舊文筆削而成今人看春秋必要謂某事譏某人如此則是孔子專任私意妄爲褒貶

孔子但據直書而善惡自著。今若必要如此推說。須是得魯史舊文參校。筆削異同。然後爲可見。而亦豈復可得也。謨

或有解春秋者。專以日月爲褒貶。書時月則以爲貶。書日則以爲褒。穿鑿得全無義理。若胡文定公所解。乃是以義理穿鑿。故可觀。人傑

世間人解經。多是杜撰。且如春秋只據赴告而書之。孔子只因舊史而作春秋。非有許多曲折。且如書鄭忽與突事。才書忽。又書鄭忽。又書鄭伯突。胡文定便要說突有君國之德。須要因鄭伯兩字上求他是處。似此皆是杜撰。大槩自成哀已前。舊史不全。有舛逸。故所記各有不同。若昭哀已後。皆聖人親

見其事故記得其實。不至於有遺處。如何却說聖人予其爵。削其爵。賞其功。罰其罪。是甚說話。祖道

或人論春秋以爲多有變例。所以前後所書之法。多有不同。曰。此烏可信。聖人作春秋。正欲褒善貶惡。示萬世不易之法。今乃忽用此說。以誅人。未幾又用此說。以賞人。使天下後世皆求之而莫識其意。是乃後世弄法舞文之吏之所爲也。曾謂大中至正之道而如此乎。壯祖

左氏之病。是以成敗論是非。而不本於義理之正。廣

君子只看道理合如何。可則行。不可則止。禍禍自有天命。且如一箇善擇利害底人。有一事自謂擇得十分利處了。畢竟也

須帶二三分害來自沒奈何。仲舒云：仁人正其義，不謀其利，明其道，不計其功。一部左傳無此一句。若人人擇利害，後到得臨難死節底事，更有誰做？其間有爲國殺身底人，只是枉死了始得。因舉可憐石頭城，寧爲袁粲死，不作褚淵生。蓋民之秉彝，又自有不可埋沒，自然發出來處。辨

左氏見識甚卑。如言趙盾弑君之事，却云孔子聞之曰：惜哉！越境乃免。如此，則專是回避占便宜者得計。聖人豈有是意？聖人作春秋而亂臣賊子懼，豈反爲之解免耶？端蒙

左氏所傳春秋事，恐八九分是公穀專解經事，則多出揣度。大必春秋制度大綱，左傳較可據。公穀較難憑。胡文定義理正當。然

此樣處多是臆度說

必大

左傳是後來人做爲見陳氏有齊所以言八世之後莫之與京見三家分晉所以言公侯子孫必復其始以三傳言之左氏是史學公穀是經學史學者記得事却詳於道理上便差經學者於義理上有功然記事多悞如遷固之史大槩只是計較利害范曄更低只主張做賊底後來却自做却敗溫公通鑑凡涉智數險詐底事往往不載却不見得當時風俗如陳平說高祖間楚事亦不載上一段不若全載了可以見當時事情却於其下論破乃佳又如亞夫得劇孟事通鑑亦節去意謂得劇孟不足道不知當時風俗事勢劇孟輩亦係輕重

如周休且能一夜得三萬人只緣吳王敗後各自散去其事無成溫公於此事却不知不覺載之蓋以周休名不甚顯不若劇孟耳想溫公平日回耐劇孟不知溫公爲將設遇此人奈得他何否又如論唐太宗事亦殊未是呂氏大事記周赧後便繫秦亦未當當如記楚漢事竝書之項籍死後方可專書漢也

當

孔子作春秋當時亦須與門人講說所以公穀左氏得一箇源流只是漸漸訛舛當初若是全無傳授如何鑿空撰得

文淵

問諸家春秋解如何曰某盡信不及如胡文定春秋某也信不及知得聖人意裏是如此說否今只眼前朝報差除尚未知

朝廷意思如何。況生乎千百載之下。欲逆推乎千百載上。聖人之心。況自家之心。又未如得聖人。如何知得聖人肚裏事。某所以都不敢信諸家解。除非是得孔子還魂親說出。不知如何。間

胡文定春秋非不好。却不合這件事。聖人意是如何下字。那件事。聖人意又如何下字。要之聖人只是直筆。據見在而書。豈有許多忖怛。友仁

昔楚相作燕相書。其燭暗而不明。楚相曰。舉燭。書者不察。遂書舉燭字于書中。燕相得之曰。舉燭者。欲我之明於舉賢也。於是舉賢退不肖。而燕國大治。故曰。不是郢書。乃成燕說。今之

說春秋者正此類也。人傑

春秋一發首不書卽位卽君臣之事也書仲子嫡庶之分卽夫婦之事也書及邾盟朋友之事也書鄭伯克段卽兄弟之事也一開首人倫便盡在

問魯桓公爲齊襄公所殺其子莊公與桓公會而不復讎先儒謂春秋不讎是否曰他當初只是據事如此寫在如何見他讎與不讎當桓公被殺之初便合與他理會使上有明天子下有賢方伯便合上告天子下告方伯興復讎之師只緣周家衰弱無赴愬處莊公又無理會便自與之主婚以王姬嫁齊及到桓公時又自隔一重了況到此事體又別桓公率諸

侯以尊周室莊公安得不去。若是不去。却不是叛齊。乃是叛周。曰。使莊公當初自能舉兵殺了襄公。還可更赴桓公之會。否。曰。他若是能殺襄公。他却自會做霸主。不用去隨桓公。若是如此。便是這事結絕了。文蔚

僖公成風與東晉簡文帝鄭太后一也。皆所以著妾母之義。至本朝真宗旣崩。始以三后並配。當時羣臣亦嘗爭之。爲其創見也。後來遂以爲常。此禮於是乎紊矣。人傑

問季札觀樂如何。知得如此之審。曰。此是左氏粧點出來。亦自難信。如聞齊樂而曰國未可量。然一再傳而爲田氏。烏在其爲未可量也。此處皆是難信處。時舉

或問子產相鄭鑄刑書作丘賦時人不以爲然。是他不達爲國以禮底道理。徒恃法制以爲國。故鄭國日以衰削。曰是他力量只到得這裏。觀他與韓宣子爭時。似守得定。及到伯有子皙之徒撓他時。則度其可治者治之。若治他不得。便只含糊過。亦緣當時列國世卿。每國須有三兩族強大。根株盤互。勢力相依倚。卒急動他不得。不比如今大臣才被人論。便可逐去。故當時自有一般議論。如韓獻子分謗之說。只是要大家含糊過。不要見得我是你。不是。又如魯以相忍爲國。意思都如此。後來張文潛深取之。故其所著雖連篇累牘。不過只是這一意。廣

聖人臨三都亦是因季氏厭其強也正似唐末五代羅紹威其兵強於諸鎮者以牙兵五千人也然此牙兵又不馴於其主羅甚惡之一日盡殺之其鎮遂弱爲鄰鎮所欺乃方大悔楊春秋獲麟某不敢指定是書成感麟亦不敢指定是感麟作大槩出非其時被人殺了是不祥淳

春秋傳毀廟之道改塗易檐言不是盡除只改其灰飾易其屋簷而已義剛

春秋本是明道正誼之書今人只較齊晉伯業優劣反成謀利大義都晦了今人做義且做得齊威晉文優劣論淳

儀禮

河間獻王得古禮五十六篇想必有可觀但當時君臣間有所不曉遂至無傳故先儒謂聖經不亡於秦火而壞於漢儒其說亦好溫公論景帝太子既亡當時若立獻王爲嗣則漢之禮樂制度必有可觀又致堂謂武帝若使董仲舒爲相汲黯爲御史大夫則漢治必盛其嘗謂若如此差除那裏得來

廣

先王之禮今存者無幾漢初自有文字都無人收拾河間獻王既得雅樂又有禮書五十六篇惜乎不見於後世是當時儒者專門名家自一經之外都不暇講況在上又無興禮樂之主故汲黯汲黯使河間獻王爲君董仲舒爲相汲黯爲御史則漢之禮樂必興這三箇差除豈不甚盛

賀孫

今儀禮多是士禮。天子諸侯喪祭之禮，皆不存其中。不過有些小朝聘燕饗之禮。自漢以來，凡天子之禮，皆是將士禮來增加爲之。河間獻王所得禮五十六篇，却有天子諸侯之禮。故班固謂愈於推士禮以爲天子諸侯之禮者。班固作漢書時，此禮猶在。不知何代何年失了。可惜。可惜。廣

儀禮不是古人預作一書如此。初間只以義起，漸漸相襲，行得好，只管巧。至於情文極細密，極周緻處，聖人見此意思好，故錄成書。只看古人君臣之際，如公前日所畫圖子。君臨臣喪，坐撫當心，要經而踊。今日之事，至於死生之際，忽然不相關。不啻如路人。所謂君臣之恩義安在？祖宗時於舊執政喪亦

親臨渡江以來一向廢此只秦檜之死高宗臨之後來不復
舉如陳福公壽皇眷之如此隆至其死亦不親臨祖宗凡大
臣死遠地不及臨者必遣郎官往弔壽皇凡百提掇得意思
這般處却恁地不覺今日便一向廢却賀孫

禮有經有變經者常也變者常之變也先儒以曲禮爲變禮看
來全以爲變禮亦不可蓋曲者委曲之義故以曲禮爲變禮
然毋不敬安定辭安民哉此三句豈可謂之變禮先儒以儀
禮爲經禮然儀禮中亦自有變變禮中又自有經不可一律
看也問

儀禮是經禮記是解儀禮如儀禮有冠禮禮記便有冠義儀禮

有昏禮禮記便有昏義以至燕射之類莫不皆然只是儀禮
有士相見禮禮記却無士相見義後來劉原父補成一篇文
蔚問補得如何曰他亦學禮記下言語只是解他儀禮

文蔚

禮妻之父曰舅謂我舅者吾謂之甥古禮甥字用處極多如壻
謂之甥姑之子亦曰甥或問姪字本非兄弟之子所當稱曰
然伊川嘗言之胡文定家子弟稱猶子禮兄弟之子猶子也
亦不成稱呼嘗見文定家將伊川語錄凡家書說姪處皆作
猶子私常怪之後見他本只作姪字乃知猶子字文定所改
以伊川嘗非之故也殊不知伊川雖非之然未有一字替得
亦且只得從俗若改爲猶子豈不駭俗據禮兄弟之子當稱

從子爲是自曾祖而下三代稱從子自高祖四世而上稱族子。個

周禮

曹問周禮曰不敢教人學非是不可學亦非是不當學只爲學有先後先須理會自家身心合做底學周禮却是後一截事而今且把來說看還有一句干涉吾人身心上事否

大抵說制度之書惟周禮儀禮可信禮記便不可深信周禮畢竟出於一家謂是周公親筆做成固不可然大綱却是周公意思某所疑者但恐周公立下此法却不會行得盡。文蔚

周禮一書好看廣大精密周家法度在裏但未敢令學者看。五

周禮一書也是做得來縝密真箇盛水不漏廣

周都豐鎬則王畿之內當有西北之戎如此則稍甸縣都如之何可爲也曰周禮一書聖人姑爲一代之法爾到不可用法處聖人須別有通變之道去僞

五峯以周禮爲非周公致太平之書謂如天官冢宰却管甚宮闈之事其意只是見後世宰相請託宮闈交結近習以爲不可殊不知此正人君治國平天下之本豈可以後世之弊而併廢聖人之良法美意哉又如王后不當交通外朝之說他亦是懲後世之弊要之儀禮中亦分明自載此禮至若所謂女祝掌凡內禱祠禴禘之事使後世有此官則巫蠱之事安

從有哉。道夫

周禮註云土圭一寸折一千里。天地四游升降不過三萬里。土圭之影尺有五寸。折一萬五千里。以其在地之中。故南北東西相去各三萬里。問何謂四游。曰謂地之四游。升降不過三萬里。非謂天地中間相去止三萬里也。春游過東三萬里。夏游過南三萬里。秋游過西三萬里。冬游過北三萬里。今曆家筭數如此。以土圭測之。皆合。僦曰。譬以大盆盛水。而以虛器浮其中。四邊定四方。若器浮過東三寸。以一寸折萬里。則去西三寸。亦如地之浮於水上。蹉過東方三萬里。則遠去西方三萬里矣。南北亦然。然則冬夏晝夜之長短。非日晷出沒之

所爲乃地之游轉四方而然爾曰然用之曰人如何測得如此恐無此理曰雖不可知然曆家推筭其數皆合恐有此理
個

嘗見季通云日晷有差如去一千里則差一寸到得極星却無差其初亦自曉不得後來子細思之日之中各有不同如極東處日午以前須短日午以後須長極西處日午以前須長日午以後須短所以有差故周禮以爲日北則景長多寒日南則景短多暑日東則景夕多風日西則景朝多陰此最分曉極星却到處視之以爲南北之中了所以無差如涼傘然中心却小四簷却濶故如此某初疑其然及將周禮來檢看

方見得決然是如此

餘

周制鄉遂用貢法故十夫治溝長底是十方底是百長底是千方底是萬都鄙用助法故八家同溝共井鄉遂則以五爲數家出一人爲兵以守衛王畿役次必簡如周禮惟挽匱則用之此役之最輕者都鄙則以四爲數六七家始出一人故甸出甲士三人步卒七十二人馬四匹牛三頭鄉遂所以必爲溝洫而不爲井者以欲起兵數故也五比五鄰五伍之後變五爲四間四里四兩者用四則成百之數復用五則自此奇零不整齊矣如曰周制皆井者此欺人之說不可行也

方子

周家每年一推排十六歲受田六十者歸田其後想亦不能無

弊故蔡澤言商君決裂井田廢壞阡陌以靜百姓之業而一其志唐制每歲十月一日應受田者皆集於縣令廷中而升降之若縣令非才則是日乃胥吏之利耳

方子

古人學校教養德行道藝選舉爵祿宿衛征伐師旅田獵皆只是一項事

間

問黨正一命齒于鄉里再命齒于父族三命不齒若據如此雖說鄉黨莫如齒到得爵尊後又不復序齒曰古人貴貴長長竝行而不悖他雖說不序亦不相壓自別設一位如今之掛位然

文蔚

小戴禮

問讀禮記曰禮記要兼儀禮讀如冠禮喪祭鄉飲酒禮之類儀禮皆載其事禮記只發明其理讀禮記而不讀儀禮許多理皆無安著處

學禮先看儀禮儀禮是全書其他皆是講說如周禮王制是制度之書大學中庸是說理之書儒行樂記非聖人之書乃戰國賢士爲之又云人不可以不莊嚴所謂君子莊敬日強安肆日偷又曰智崇禮卑人之智識不可以不高明而行之在乎小心如大學之格物致知是智崇處正心脩身是禮卑處

卓

問年長以倍則父事之這也是同類則可曰他也是說得年輩

當如此又問如此則不必問德之高下但一例如此否曰德也隱微難見德行底人人也自是尊敬他又問如此則不必問年之高下但有德者皆尊敬之曰若是師他則又不同若朋友中德行底也自是較尊敬他

義剛

檀弓恐是子游門人作其間多推尊子游

必大

幼名冠字五十以伯仲死謚周道也所謂以伯仲者蓋古者初冠而字便有伯某父仲某父三字了及到得五十卽除了下面兩字猶今人不敢斥尊者呼爲幾丈之類

夔孫

死謚周道也史云夏商以上無謚以其號爲謚如堯舜禹之類看來堯舜禹爲謚也無意義堯字從三土如土之堯然而高

舜只是花名所謂顏如舜華禹者獸跡今篆文禹字如獸之跡若死而以此爲謚號也無意義况虞舜側微時已云有鰥在下曰虞舜則不得爲死而後加之謚號矣看來堯舜禹只是名非號也問

姪對姑而言今人於伯叔父前皆以爲猶子漢人謂之從子却得其正蓋叔伯皆從父也道夫

王制四海之內九州州方千里及論建國之數恐只是諸儒做箇如此算法其實不然建國必因其山川形勢無截然可方之理必大

月令比堯之曆象已不同今之曆象又與月令不同人傑

不行秋令之類不知是天行令是人行令曰是人行此令
則召天之災

師保疑丞疑字曉不得想只是有疑卽問他之意

銖

問禮運似與老子同曰不是聖人書胡明仲云禮運是子游作
樂記是子貢作計子游亦不至如此之淺

可學

用人之知去其詐用人之勇去其怒用人之仁去其貪知與詐
勇與怒固相類仁却如何貪蓋是仁只是愛愛而無義以制
之便事事都愛好物事也愛好官爵也愛錢也愛事事都愛
所以貪諸家解都不會恁地看得出又問雖是偏不是有一
邊無一邊曰那一邊也是闕了

胡泳

問愛與欲何以別曰愛是汎愛那物欲則有意於必得便要拏將來淳

問人者天地之心曰謂如天道福善禍淫乃人所欲也善者人皆欲福之淫者人皆欲禍之又曰教化皆是人做此所謂人者天地之心也素

別子爲祖繼別爲宗是諸侯之庶子與他國之人在此邦居者皆爲別子則其子孫各自以爲太祖如魯之三家季友季氏之太祖也慶父孟氏之太祖也公子牙叔孫氏之太祖也偶

問有小宗而無大宗者有大宗而無小宗者有無宗亦莫之宗者曰此說公子之宗也謂如人君有三子一嫡而二庶則庶

宗其嫡是謂有大宗而無小宗皆庶則宗其庶長是謂有小宗而無大宗止有一人則無人宗之已亦無所宗焉是謂無宗亦莫之宗也

人傑

善問者如攻堅木先其易者後其節目非特善問讀書求義理之法皆然置其難處先理會其易處易處通則堅節自迎刃而解矣若先其難者則刃頓斧傷而木終不可攻縱使能攻而費工竭力無自然相說而解之功終亦無益於事也問相說而解古注說音悅解音佳買反曰說只當如字而解音蟹蓋義理相說之久其難處自然觸發解散也

問

看樂記大段形容得樂之氣象當時許多形名度數是人人曉

得不消說出。故只說樂之理如此其妙。今來許多度數都沒了。却只有許多樂之意思是好。只是沒箇頓放處。如有帽却無頭。有箇鞋却無腳。雖則是好。自無頓放處。司馬溫公舊與范蜀公事事爭到底。這一項事却不思量着。賀孫

古者禮樂之書具在人。皆識其器數。却怕他不曉其義。故教之曰。凡音之起。由人心生也。又曰。失其義。陳其數者。祝史之徒也。今則禮樂之書皆亡。學者却但言其義。至於器數。則不復曉。蓋失其本矣。方子

一倡而三嘆。謂一人倡而三人和也。今之解者。猶以爲三嘆息非也。簡

物之感人無窮而人之好惡無節此說得工夫極密兩邊都有一些罪過物之誘人固無窮然亦是自家好惡無節所以被物誘去若自有箇主宰如何被他誘去此處極好玩味且是語意渾粹個

問禮勝則離樂勝則流既云離與流則不特謂之勝禮樂已亡矣曰不必如此說正好就勝字上看只爭這些子禮纔勝些子便是離了樂纔勝些子便是流了知其勝而歸之中卽是禮樂之正正好就勝字上看不可云禮樂已亡也個

問明則有禮樂幽則有鬼神曰此是一箇道理在聖人制作處便是禮樂在造化處便是鬼神或云明道云天尊地卑乾坤

定矣。鼓之以雷霆，潤之以風雨，是也不知天地尊卑是禮鼓之潤之是樂否？先生乃引樂記天尊地卑至樂者天地之和也一段云：此意思極好，再三歎息。人傑去偽

樂由天作，屬陽，故有運動底意；禮以地制，如由地出，不可移易。

升卿

樂樂其所自生，禮反其所自始，亦如樂由中出，禮自外作，樂是和氣從中間直出，無所待於外；禮却是始初有這意思，外面却做一箇節文抵當他，却是人做底，雖說是人做，元不曾杜撰。因他本有這意思，故下文云：樂章德，禮報情，反始也。文蔚問如何是章德？曰：和順積諸中，英華發諸外，便是章著其內。

之德橫渠說樂則得其所樂卽是樂也更何所待是樂其所自成說得亦好只是樂其所自成與樂其所自生用字不同

爾文蔚

問樂以治心禮以治躬曰心要平易無艱深險阻所以說不和不樂則鄙詐之心入之矣不莊不敬則慢易之心入之矣節

春禘秋嘗霜露旣降君子履之必有悽愴之心非其寒之謂雨露旣濡君子履之必有怵惕之心如將見之樂以迎來哀以送往故禘有樂而嘗無樂蓋春陽氣發來人之魂魄亦動故禘有樂以迎來如楚辭大招中亦有魂來之語秋陽氣退去乃鬼之屈故嘗不用樂以送往義剛

問其氣發揚于上爲昭明。焄蒿悽愴曰：此是陰陽乍離之際。髣髴如有所見。有這箇聲氣昭明。焄蒿是氣之升。騰悽愴是感傷之意。文蔚

問其氣發揚於上爲昭明。焄蒿悽愴曰：昭明是所謂光景者。想像其如此。焄蒿是騰升底氣象。悽愴是能令人感動模樣。墟墓之間未施哀而民哀是也。洋洋乎如在其上。如在其左右。

正謂此。德明

問聖人凡言鬼神皆只是以理之屈伸者言也。至言鬼神禍福凶吉等事亦只是以理言。蓋人與鬼神天地同此一理。而理則無有不善。人能順理則吉。逆理則凶。其於禍福亦然。豈謂

天地鬼神一一下降於人哉。如書稱天道福善禍淫。易言鬼神害盈而福謙。亦只是這意思。祭義宰我曰。吾聞鬼神之各不知其所謂。孔子曰。氣也者。神之盛也。魄也者。鬼之盛也。又曰。衆生必死。死必歸土。是之謂鬼。骨肉斃于下。陰爲野土。其氣發揚于上。爲昭明。君蒿悽愴。百物之精神之著也。魄旣歸土。此則不問其曰氣曰精曰昭明。又似有物矣。旣只是理。則安得有所謂氣與昭明者哉。及觀禮運論祭祀。則曰以嘉魂魄。是謂合莫。注謂莫無也。又曰上通無莫。此說又似與祭義不合。曰。如子所論。是無鬼神也。鬼神固是以理言。然亦不可謂無氣。所以先王祭祀。或以燔燎。或以鬱鬯。以其有氣。故以

類求之耳。至如禍福吉凶之事。則子言是也。謨

大戴禮

大戴禮冗雜。其好處已被小戴採摘來做禮記了。然尚有零碎好處在。廣

太公銘几杖之屬。有不可曉不着題之語。古人文字只是有箇意思。便說不似今人區區就一物上說。